



T5464/83 (10)

CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY

OCT 23 1958







敬業堂詩集卷二十三

海寧查慎行

悔餘

印

得樹樓集

起丁丑正月  
盡十二月

吾家自喪亂後僅存橫溪老屋與兩弟同居余所  
棲在西北隅年深瓦落不足以庇風雨丁丑春大  
兒倖舉南宮挈之還家爰即舊址改築小樓樓成  
而老木數十章皆在几榻間因取少陵詩意顏曰  
得樹

人日同孫松坪張漢瞻楊晚研宮友鹿錢亮功  
方拱樞吳元朗蔣楊孫家德尹集王赤杼邱舍  
分賦上元燈八首



四垂羅帶影飄飄一綫中懸愛細腰莫傍市門輕銜影  
有人依樣要偷描

瓶口紅光忽吐蜺醉人相對舌如箕却因酒具名相似  
記起花時鳥勸提

右葫蘆燈

傴僂聊為秉燭遊似曾閱世笑蜉蝣朱門光景番番換  
幾輩相看到白頭

故紆形容大可憐敢同南極指星躔誇人只有香山老  
張丈前頭炫少年

右老人燈

鱗鬣粧成畫不如竿頭擎出晚晴初九衢塵淨月如水  
一隊人隨一隊魚

星橋鎖動沸波濤人海中間湧巨鰲多少書蟬曾飽死

三年簪筆作名臣四紀還家為老親

實齋前以終養乞歸

仕路卷

舒雖在我田間屬望更何人朝無遺闕書應少邑有更  
張見頗真為語司徒仍舊制也教游惰識公旬

### 介菴叔惠菊花

宗老移花到家童掃地迎澆深經夏早開晚及秋晴酒  
復何人送詩從即事成濁醪留一醉珍重見君情

### 次兒武原歸舟又得菊數種

道遠宜兼土船輕不費擔好花來一一荒徑闢三三萬  
事同兒戲餘香借客談瓦盆非俗物多取未為貪

### 有携折足几來售者以百錢買之

折足用不適傾囊計亦疎聊將安破硯或可配殘書棄

置終憐汝枝梧頗累余難憑非一几舊友比何如宋人詩舊友誰如几可憑

園中西府海棠秋盡忽發花

萬木正搖落一枝春忽回縱饒花意好不稱此時開草本名相托霜風艷恐摧天寒憐袖薄為爾一低徊

客來

與世了無競并教棋局閒客來無一事籬下看南山

再偕介菴叔過村西僧舍看菊

憶昨披榛入經旬踏葉來秋花偏耐久名種或遲開天意晴連月自重九後不雨人生夢幾回屢遊貪佛日原不為啣杯

讓他枵腹事焚膏右魚燈

一幅輕紗隔座深芸牕小立夜沈沈不爭六曲屏山好虛費人間屈戌金

三尺孤光一片冰當筵珠翠照何曾眼昏已少看花分更隔看花霧一層右屏風燈

二月杪南歸涿州道中遇雪十八韻

頗訝今年雪方知此地寒春深猶漠漠野濶更漫漫咳吐紛珠玉飛揚富羽翰近從煙際辨遠入霧中看鴻爪輕留跡揚花滾作團風輪旋蟻磨車轍轉蜨丸銀海光相耀瓊田暖未殘密防蟲戶啟細補鵲巢完淺草勾尖沒枯株萬木攢千家如畫裏雙塔拍城端石滑經橋怯

沙平取徑難幾曾填窞井特為顯峰巒席帽融冰濕征  
衣燎火單茅茨雖易壓穴隙莫相鑽對爾吟慚郢催余  
鬢比潘勿愁燈焰短直愛酒升寬朔候何當變泥塗不  
肯乾明朝有奇計酪酏上歸鞍

連日車行泥淖中朝來催短驢自固城至安肅  
縣凡兩隋鞍即事有感

雪消春水發古道窪然低客行忽落此局促如雞栖兩  
車同隻輪六馬併一蹄力盡甫脫險阮深復無蹊長恐  
雪繼作有滄雲萋萋晨興天色佳日脚垂虹蜺跨驢橫  
短策快比駿馱馱西南見郎山刻露出角圭寧如一往  
氣世路偏多迷蹶跌豈及防康莊有排擠前行苟無失

遲速理亦齊還來車上坐且免衣沾泥

保定旅次閱邸抄得從弟東亭及兒建南宮捷  
音口占志喜兼寄嘲老友姜西溟

邸報傳來樂事重一尊相屬慰浮蹤青春三月客懷好  
白髮半頭歸興濃子弟聯翩同榜羨家門成就老夫慵  
探花却入少年隊試問髯姜可勝儂時姜亦成進士

渡三汊河聞前路泥乾喜而有作

三汊河畔水濺濺洗盡春泥上渡船從此騎驢似騎鶴  
折條垂柳當歸鞭

晚抵安平縣

野曠天高落日紅近城烟氣忽如籠楊椿綠上鷓棲處

草意青回馬跡中昔夢尚驚泥活活歸心還怕雨濛濛  
衰遲自分邀天幸坎陷迴車路未窮

大風過深州城外

驚沙袞袞日黃黃不料東風爾許狂茅屋捲空留破柱  
酒旗吹折剩萸楊幾家賣餅枯壕畔一老扶犁大道旁  
為話連年秋潦苦出車畿甸正輸糧

曉渡衡水橋風色甚寒小飲市樓

石古橋滑臨奔湍衡漳流濁同乘乾高樓下瞰岸千尺  
美酒大書旗一竿帽絮蒙頭欲敗意魚羹入饌聊加餐  
杏花全未有開信知是北來風色寒

棗強道中喜晴

斷雲開四望初日解重陰野氣浮天動烟光薄樹深疲  
牛尋故跡老馬得歸心題徧旗亭壁何人識苦吟

客有稱高唐州為縣駒里者戲成絕句

野語齊東最易訛縣駒遺俗近如何自從一變崑山調  
不是吳兒不善歌

大道曲

荒鷄聲遲月落早行人出門看參昴一條大道飛古塵  
歲歲何曾長春草我欲疊作山羊腸九折爭躋攀我思  
鑿成水涵人出沒波濤裏直教馬無四足車輪方此路  
始應春草長

穀城山



東阿城東穀城趾傳是仙家舊鄉里圮橋老叟果何人  
能致留侯跪進履兵書一卷既不傳事往無徵正在此  
秦皇凶暴蔑賢聖偶語詩書皆棄市布衣起自泗上亭  
洩溺儒冠固其理此非可以正道說詭託陰符自茲始  
竟參帷幄佐竒謀躡足時時還附耳大蛇中斷群雄滅  
走狗旋烹舊臣死舞陽活自女嬃偷蕭相生遭獄吏恥  
子房遠禍蓋有道直視侯封同敝屣神仙之說誠渺茫  
有托而逃斯隱矣陋儒讀書寡深識異事人人徵太史  
後來競指黃石公當日原無赤松子我為此語豈好竒  
石若有知呼可起

清明後一日同戴田有弟東亭兒克建重游濟

### 寧南池

露氣霞光水洗鮮孤城深入鏡中天杏花風暖高樓笛  
柳色烟濃隔浦船蠟屐半生凡幾兩青袍一夢忽三年  
壯心敢擬桓宣武直為攀條也自憐

### 黃河打魚詞

桃花春漲衝新渠船船滿載黃河魚大魚恃強猶掉尾  
小魚力薄唯噉水魚多價賤不論斤率以千頭換斗米  
河壩大潦秋不登今年兩稅姑停徵但願田荒免逋賦  
與官改籍充漁戶

### 大風渡黃河舟中與長源姪對局

柳絮春狂剪渡風片帆飛下急流中船頭已達長淮岸

一局殘棋劫未終

過揚州示崔性甫楊曉先兩同年

不到紅橋已八年有人柳下記停船  
楊郎落第崔郎病縱使同遊越可憐

閏三月朔日蝕舟中遇雨紀事

丁丑閏三月日食法當既明星晝當見從卯當至未白  
晝如昏黃果然伊可畏舟行拚偃臥閉目聊自慰何來  
打篷聲雨點驟如沸皇天閔垂象下土雲翳飄似欲弭  
此災而為不祥諱我聞日當食不食乃足貴豈有晦昧  
晨又蒙霾霧氣將毋陰太盛推驗得髣髴六師方犁庭  
櫓槍掃敵愾佇清沙漠塵聲教朔南暨公卿滿臺閣賀

表辭不費五事占休徵竊疑非此謂天變雖偶然民勞  
亦宜墜野人語無擇托興在蒼蔚不敢學盧仝險艱殊  
少味

初到家戲謝戚黨之見賀者

趣伴携兒出帝畿到家猶及換春衣  
遠煩親友來相賀不道余仍下第歸

兒建赴殿試北上詩以示之

今年夏苦旱六月未徂暑兒子將北行  
衝炎逐徒旅留之又不可遣去無多語  
汝名已倖成汝力正須努

天子方右文策名在當宁萬言應廷對  
有抱期畢吐煌煌鐘虞懸叩擊諧律呂  
自從制科設得士凡幾許置汝于

其間太倉特一黍然而勿自薄儕輩盡翹楚同年百五十若者拍可數父事中有人姜西溟吾癸酉同榜嚴雁寶仍吾同學老友也行敢兄序功名亦時至非可有意取造物吝虛名齒角肯兼予吾宗兩太史荆州兄並遙搏風羽盛事傳一時借居隣章杜雖云官禁近未免索米苦汝今往整依慎勿希華膺秋深決歸計且復返鄉土久甘南巷貧差勝北門窶千薪尚壅積銓注十纔五從政雖多途不如科目舉讀書想先輩既進或慚沮豈必一第邀便思行綰組閉門更力學合轍驗今古却出作選人於世冀小補而翁百念灰自審莫若處諄諄向臨發庭誥述父祖吾但當弄孫門戶全付汝

得樹樓初成以詩落之九首

百年計樹人十年計樹木辛勤荷先澤以有此老屋兵火乃幸存曩基方改築勞生竟何得去此空馳逐誓收湖海蹤歸掃一庭綠樓成名得樹外是非吾欲

五架初度材謂在百金內銖銖累木石所費奚啻倍貧家事難輕發每追悔連朝責逋負工藝集群喙將為逃債臺一笑付聾聵

列垣周四隅與樓勢迴環憑高無遠矚胡以開心顏竅壁延綠陰少見天疑慳別添一小閣忽湧海外山豁然百里日乃在圭竇間

貞白居三層元龍臥百尺神仙彼可致豪氣我非昔方

當狎斯人未許校什伯敢云去地遠稍與雞豚隔尚恐  
鳥雀群移巢避生客

一榻雖已安終慚自為計心長髮苦短力不及諸弟前  
人締造艱親歷始知勤撫茲念堂構補葺當次第身在

吾敢辭茫茫配根蒂

用少陵四  
松詩中語

設梯盡十級偃僂連雕尻日上能千回兒孫捷飛猱阿  
翁貪靜坐嗔嚇時一遭形神既未忘那免陟降勞習勞  
亦不憚所戒舉趾高

卑濕苦舊樓老根連草蔓新來稍軒敞恰直樹之半雖  
除螻蟻緣却被蝸蟪亂朝眠與晝坐鳴聒傍几案推牕  
驚不去疎響或一斷喧寂兩聽之老夫化成見

夕陽轉庭西樹影來墻東龍蛇動戶牖始知天有風開  
襟亟當之快若逃虛空人間正炎熱置我微涼中

竹垞工八分大字作擘窠為余題歲月惜墨不費磨懸  
之樓中央筆勢翻江河疑挾風雨至颯然散高柯時時  
臥其下所得良已多

樓上看雨

臥聞牀下殷輕雷起拓南窓八扇開墻缺雲流山影去  
樹頭風截雨聲來一鳩逐婦移陰立雙燕將雛取勢回  
我本無田還望歲略分餘潤到蒼苔

題周兼畫南唐小周后真六首

人間姊妹工相妬遺恨茫茫豈有涯  
韶悵瑤光梅信晚

一枝潛進未開花

湘裙如水不擡風鳳味携來倒挂紅色色丹青無著處  
泥金一縷在雙弓

月暗花明霧氣多盈盈羅襪步凌波外間誰管深宮事  
偷唱新聲子夜歌

不須更減一分肌周昉繇來善貌肥如此丰姿如此畫  
當初猶道未勝衣

開寶初元議禮遲待年承寵已多時在廷只有韓熙載  
曾托元和諷諭詩

垂鬟分絡髮初長想是南朝時世粧指與俗工從未識  
可憐絕筆付周郎

時兼惜  
已下世

晚景

晚景蟲聲入空庭易夕陽鵲巢風更穩鶴骨露初涼病  
葉非關蟲秋花不取香物情閒處得吾轉惜流光

次韻答顧搢玉

失學負壯年東西逐烏兔蹉跎髮漸絲落拓衣仍布者  
心躡前踵回首却故步歌筑混屠沽唱酬雜緇素歸來  
稍稍悔事去種種悟庶望針砭加奚啻雪霜雨去聲雖蒙  
同人憐或恐異已妬之子負高才於余枉佳句紛然蓬  
麻中直拔千尺樹溫恭具真性磊砢得竒趣何期天畔  
鴻狎此沙頭鷺知音世不遭敢惜肝膽露鷄鳴風雨晦  
旅館燈燭暮明朝走相尋戶外有二履由來意氣合詎

若邂逅遇君家門地高舊是雲間顧昂藏自殊衆標榜  
不在互問途慚已經吾老乃迷路

雨夜過徐淮江二首

萍浮梗泛久西東每過南湖憶此翁斷港船通新漲水  
空庭樹拔去年風五經自課佳兒讀半刺曾嫌俗客通  
好是扣門能不拒一燈重對雨聲中

草堂南畔小池幽一片蘆聲蓼穗秋滿壁詩牋存歿泪  
積年書疏往來郵閒追昨夢驚彈指老剩貧交幸到頭  
未免對君還自媿桑榆晚景亟宜收

八月十六日同鄭春薦嚴定隅吳紫葢家潤木  
湖頭小飲風雨大作泊舟湧金門外是蚤襪被

而出晚來興盡入城戲作一律邀諸子並和

及到繁華地翻成寂寞游烟波三百頃風雨一孤舟山  
好偏宜澹湖空易作音秋却防漁父笑襪被不曾留

種菜四章

晚豆尚沿籬秋瓜已除架畦丁惜地利菜子及時下功  
力積纖毫滋培仰造化勾萌達新雨布綠密無罅一旬  
可分蔣半畝不待借用東坡事既足散其餘猶能乞音隣舍  
灌溉既已勤其長亦奮迅窠窠盡發洩生意不少吝連  
朝風日晴秋蟻忽成陣洒灰得方法經驗始深信幸是  
力能施何難手除痰黍苗被蟲食四野年不順老圃奪  
天工忍饑聊免饑

晚菘雖弱植不怕霜雪加秋種春可蒔盤餐佐貧家根  
株諒無幾口腹豈有涯人間賣菜傭求益方紛拏禦冬  
吾有計旨蓄良足誇

杜陵客西川種藝頗有園清晨送菜把乃感地主恩茲  
事吾不取恐為貪夫援於世苟無求食力稍自尊英雄  
亦如此無事且閉門

九日獨行園池上看木芙蓉

雨後罷登高杖藜惜腰脚園荒少秋菊無以慰寂莫兩  
株木芙蓉紅白正聯萼忽然失明鏡萍漲水將涸坐使  
雙嬋娟影妍無處著空持好顏色脉脉自開落應得主  
人憐新晴走赴約吾衰減情累於物何厚薄不忍廢重

陽逢花還命酌

友人齋中看菊

幽人如晚卉愛傍籬邊遊瓦盆薦茅齋高下凡千頭紅  
紫豈不好黃花乃吾秋森然群豔中正色與日謀競賞  
違衆嗜獨吟發孤愁泉明不可作孰與偕唱酬

喜又微姪自南昌歸

共客洪州幕回頭十五年未成宗炳臥各有尚平牽身  
健貧何礙吟深句必傳故鄉稀酒伴日日望歸船

傷庭前牡丹四首

別樣風光散綺羅豪家亭榭占春多天公直似相欺得  
不為茅齋剩一窠

兩行枯卉列東西綠上苔痕路不迷夜月魂歸吾望汝  
半年猶護種花泥

自知未到忘情處幾度徘徊惜好枝不獨我憐人亦爾  
空欄客過立移時

依稀一夢閱繁華草沒庭荒野老家省却暮年多少事  
灰心從此不栽花

觀刈早稻有感

襤褸相逢半壓肩刈禾爭趁老晴天蒹葭對岸遮隣屋  
蚱蜢如風過別田地瘠不知豐歲樂民勞尤望長官賢

誰知疾苦無人問秋稅新增戶口錢

吾邑戶籍十萬每丁歲輸力役之征

今年忽從田賦加派數百年舊制壞矣

偕介菴叔訪菊步入鄰僧融然房

偶聽村家打稻聲夕陽影裏向西行一叢深樹擁精舍  
兩板壞橋支斷浜靜對老僧通菊氣怕逢俗客問花名  
只將我算東籬伴不要溪頭費送迎

家釀新成獨酌至醉

種秫始徵收釀法遵舊譜逡巡俟其熟計日屈指數朝  
來香滿城甘滑如潑乳開嘗親洗盞一飲一升許好客  
期不來頽然自稱主黃農忽已遠薄俗難久處寧知醉  
鄉中風氣仍太古尊前可徑造有路胡勿取

秋感六首

蟋蟀鳴近牀蝸蟬閒無聲二蟲相代禪中已寒暑更大



敬業堂詩集卷之三  
廿  
哉造化理乃以微物呈人從此中老擾擾何多營天機  
昧群動靜者觀我生

未俗愛盆山花草妃紅白白看看耳目玩屈辱到松栢可  
憐千丈材窘束不盈尺寓形難自主抱性終莫易亦復  
耐歲寒蒼然傍几席對之還失咲未覺生意窄向非冰  
雪姿雨露有夭折

菊蕊日以黃楓葉日以紅物情判老穉變態隨霜風霜  
風故無私榮悴兩不同一般賞顏色矇叟隨盲童

西隣一老樹有藤縈繞之歲久腹漸空槎枒但枯枝借  
藤以為葉下蔭仍紛披藤如有矜色張王去聲方乘時爨  
薪伐不材斤斧旦夕施樹摧藤亦斷附麗終奚為

世衰分誼薄適用取目前紈扇遇秋風一度一棄捐不  
念昔當暑與人久周旋我有敝羊裘隨身二十牛皮存  
毛半附無補冬號寒明年與汝期五月拂釣竿

渡淮橘成枳一變性終失不聞返故土枳又化為橘人  
生百年中孰是保初質就衰水赴壑駐景戈挽日幾見  
白頭翁鬢霜復如漆

送學菴弟入都

黃葉打茅簷北風如矢棘此時來叩戶問子有底急為  
言將別家結束赴京國可無酒一杯為子煖行色匆匆  
乃徑去有語惜不得子誠吾家駒頭角早岐嶷賦質負  
高明秉心就沈默讀書十行下洞照窮樞闕經史及百

家貫穿歸組織時文雖小試落筆輒英特皇天不憐才  
盛壯遭屈抑十年踴塲屋知者為太息昨遇曲阜公青  
雲加賞識拔之冠多士庶用示矜式虛名萬口傳子故  
深自匿窮鄉甚生趣巷遇歌偈仄堂上有老親髮絲白  
變黑鑿坏豈得已彼屺傷遠陟幸托賢主人時與陳實齋黃門同  
行解推濟其嗇男兒志未遂放轍無南北不聞橫海鱣  
蟠尾肯溝洫余方踏歸路投老尚迷惑子真賢友生東坡  
詩豈徒為我弟朝夕宜在側奈何不能留又復奪有力  
要是賢友生江河歲月晚追逐乏羽翼道逢南來鴻寄書慰相憶

送陳實齋給諫服闋還朝兼呈大司農澤州陳公時吾邑賦役不均頗望當事者留意也

冬曉語溪舟中

江鄉已牢落冬候更蕭條風葉鳴孤樹霜溪影一橋沿  
塘收蠅斲遠市插魚標雀鼠何多耗年荒爾獨驕

陳傅巖給諫以種園圖索題二首

身在元龍百尺樓菴居那便署休休慣聽絲竹知魚樂  
別築陂塘領鶴遊僮約屢申松菊徑水租新報芰荷洲  
黃橙綠橘皆垂實歲計如農亦有秋

鴨舍鵝欄

閩門內橋名見吳郡志

地接聯鄰翁拍點舊平泉

園為申文

定公別業橋通別業仍三徑樹到成陰已百年碁局且從閒  
處布畫圖留與後來傳看君用意真幽絕要使詩家賦  
輞川

虞山張文貽乞節母于太君七十壽詩

妻無夫兒無父襁褓伶仃半生苦兒無父母有兒白頭  
綽楔光門楮人言張子孝我謂子孝由母慈人言張母  
賢我謂母賢非子世不知不見吾家節母苦節與張比  
旌典不加坐無子今年生亦七十矣家叔母葛太君十  
九稱未亡人去年  
六十九苦  
節而歿

歲寒雜感十首

斗室寬然著老夫欠伸纔罷又跣趺書能引睡聊遮眼  
吟不求工似惜鬚古佛可燒同楮拙濁醪得煖勝醍醐  
自從悟徹安心法儒墨同歸識一塗  
萬里從戎記黑頭不成一事老林丘稍收芋栗宜充腹

不犯冰霜可廢裘橘柚洲前非楚澤鶴鴉沙外是涼州

最憐跋扈飛揚氣歲晚因人尚遠游聞德尹於十一  
月赴蘭州幕府

文章鐘鼓付盲聾都入閒吟靜嘯中敗竹行疎猶響雪

枯桑葉盡自鳴風物情豹隱龍蛇蟄歲事星回日月窮

不信鄒生居黍谷能吹煖律挽天工

小閣簾開取向東寒天強半是西風瓷餅減水朝防凍

布被加絲夜代烘袖手輸贏迷黑白轉頭兒女換青紅

自知於世全無用新署頭銜號長翁宋陳造云物之無  
用者為長故自號

江湖  
長翁

力田制策已殊科忽枉瑤箋到薜蘿得路君言猶若此

窮愁我况更如何同年顧書宣見寄詩有病中  
趨死易貧裏養生難之句行藏委

運談何易人鬼論文意太苛虞山錢玉友寄詩有窮通判人鬼隔絕如陰陽之句  
傳語兩家多憤激向來結習費消磨

鑿開渾沌本無情萬竅從教怒不平巧竿誰能推雪片  
頑空何自起風聲陰陽橐籥機相引水火丹爐勢必爭  
真宰茫茫竟誰是難憑齊物詰莊生

偷存子敬舊寒壇與汝相依已有年向老情懷偏戀舊  
過時顏色敢爭妍嬾魚冰底頭頭伏凍雀枝間箇箇拳  
便學蟄蟲吾亦得屈伸何事乃關天

無聊且作杜門人肯逐鄉風鬥比隣俗儉稱家刪饋歲  
年衰無伴看迎春生涯豈可謀妻子鄙事何煩瀆鬼神  
但使黃金同土價齊奴巴婦一時貧

誰將正變溯源流今古何殊貉一丘稊米太倉雖見錄  
遺珠滄海詎勝收斑窺半豹難爲管腋萃千狐始是裘  
好與風騷搜累代他時文選續名樓竹垞先生書來相約同選宋元明詩  
剝啄聲中歲徧除督催詩債甚追呼不徇俗好頭今白  
自去名心膽更狃耐冷且來尋筆研消閒差覺勝撻捕  
此中甘苦何人識豈獨雕蟲悔壯夫

### 聞李辰山藏書多歸竹垞

嘆息詩人失李頎柘湖回首舊遊非自憐老友今無幾  
且喜藏書得所歸萬卷又增三篋富千金直化兩蚨飛  
平生謬託知交在悔不從渠借一瓿

### 近遊集

起戊寅正月至三月

束廣微志狹九州爰作近遊之賦跡不越井里田  
園事不離衣裳男女近則近矣於遊之義奚取乎  
余自己未至今南北往還約計七萬里將收遊蹤  
自遠而近茲集所以志也

戊寅元日

屋頭初日靄春暉梅蕊看成豆粒肥扣齒焚香吾起早  
敲門投刺客來稀舊梳白髮新逾短貧煉初心老肯違  
苦覺鶴山聞道晚方知四十八年非魏了翁詩四十八年成一非

盛宜山新築瓣香菴於南湖之上雪中過之索

詩賦贈二首

三十年前舊酒徒天教晚節占南湖不辭太守分清俸

便有游人拍畫圖水鳥雲帆爭出沒風簾雨檻對虛無  
繞籬尚少成陰樹先種芭蕉一兩株  
半間小閣一枝藤餘事行看次第增野色憑闌慰面面  
遠烟浮樹塔層層不知雪裏參禪坐何似花時挾妓登  
畢竟前言吾是戲近來詩派併傳僧

雨中同朱十表兄過宿徐淮江聽鶯齋

去城日已夕曲折尋枉渚水涸舟屢膠用篙迺舍櫓兩  
人苦兀坐拄杖入村陽稍稍深竹間疎燈翳復吐此來  
占不速况復往遇雨犬吠僮僕嗔開門揖賢主熟薪燎  
我衣敲冰轆汝釜明朝迫人日節物良有取剪韭佐春  
盤嘉肴竟踰五新年困酒食愛逐清談侶一醉不得辭

重君風義古

穀日至當湖沈南疑招同孫嘯夫過陸瞻成耕  
廬探梅分韻得豐字

殘冰消盡水光中短棹移灣港汊通小圃花經人日雨

先一夕故人酒敵石尤風溪山興發長先到看核年荒

勿太豐醉墨欹斜吾自笑草書未暇為匆匆是夕瞻成索書楹帖

凡三易紙乃成故云

大風渡前山漾

川光蕩我前一碧開玻璃岸澗山斷續船輕浪參差但  
聞捍索鳴心與閒雲馳萬木盡却走孤帆正窮追道場  
屹不動白堦如卓錫平生汗漫遊老嬾意漸墮結念在

茗雪泛宅方自茲

重至湖州戲簡許舜功張桐軒兩學博

偶然乘興到西吳社日還尋舊飲徒不用恢諧歸割肉  
上丁纔過定膳吾

座主清溪徐公招同楊玉符編修談未菴文選

泛舟碧浪湖

蒲柳城南水一方三年重此泊吳航閒陪白社青門客  
愛入銀鷗雪鷺鄉帳下諸生看漸老甕頭吏部最能狂  
烏巾美酒東風汎并作澄湖匹練光

雨中游飛英寺次東坡稀字韻

春陰覆城堞花淺游人稀愛此北郭幽晨征夕忘歸盤

旋上翠堵恣眼窮清暉東風拂面寒細雨濕我衣客來  
僧啓鑰客去僧掩扉跡在有迎送心空無是非

春分前一日余征吉學博招集杏花下

落盡苔枝春欲分杏花庭院又斜曛得錢沽酒即相覓  
誰似能詩鄭廣文

登道場山次東坡先生舊韻

船迴浦淑淺徑轉村陽小不覺坡陀高騰身萬松杪菰  
城陷井底白塔巒雲表浮氣盪一州湖波白渺渺天長  
接遙翠目極青未了漸上伏虎關群峰忽環繞清颺蓄  
戶牖古殿深且窈脈絡引檻泉淙泓滙池沼長廊百餘  
步旁入逾幽悄蒼鼠窺別枝投空攫啼鳥歸然翠微閣

中敞外見少野火不到山蒼蔚復誰燎坐令杉桂材蒙  
茸委蓬蓼飛蟲晝轟聚高蔓晴天矯老僧守空庖恐作  
山中殍軍持乞米出厭寂喜膠擾我來久徘徊愛此吟  
風篠春深花淡淡日暮雲孃孃餘暉帶疎鐘詩境隨空  
杳古今一大夢回首隔昏曉

二月十六夜自長水塘乘月放舟二鼓抵嘉興

城下

兩岸朧朧桃李花一天風露屬漁家小舩卧聽櫂歌去  
行到鴛湖月未斜

同竹垞表兄飲譚護城給諫南樓看海棠

我愛城南給事宅海棠兩樹紅交加墻頭過酒便留客

樓上點燈兼照花濯枝偏宜的樂雨倦眼似隔朦朧紗  
徑須時赴二老約爛醉不問東西家

寒食鍾復周秀才家看海棠和鍾飛濤

一樹萬花稠花光盡入樓偶逢寒食賞偏憶少年游照  
座驚紅艷傷春到白頭苦憐風雨惡燒燭爲君留

清明日南湖泛舟

積雨初霽交清明桃花杏花飄滿城城南水色綠於酒  
鵝鴨一灘春草生

曾道扶學憲憲蜀中藥材

吾比多幽憂早衰坐善病豈無三年艾眞贗苦難證炮  
炙投成方庸醫執其柄邇來讀本草稍稍諳藥性蜀山

美產多州邑若畫境靈苗倘易地厥品變邪正時俗但  
徇名采眞復誰更先生校蜀士甲乙手親評開籠貯參  
苓拔茅群有慶餘材搜草木良楛別明鏡萬里宦游裝  
錐刀肯相競大江五六月風壯波濤盛百束壓歸艤蛟  
龍不敢橫分張荷見及行篋忽輝映從來苦口利義比  
良友諍若待倉猝求誰爲緩急應於公感深意臭味殊  
可敬

上巳雨中同竹垞及兒建再赴淮江招

三月三日東風寒徐尚書家春未殘半篙新水淥忍唾  
兩樹碧桃紅耐看蛙黽幸未聒人耳蛤蜊大可充君盤  
一番相過一冒雨咲口欲開爾許難



題沈南疑林屋山居圖卷子二首

莫釐峰下是查灣，及記扁舟壓雪還。一事至今留缺陷，不曾西到石公山。

浮家泛宅事良難，綰綬行將赴一官。縱使買山爭得住，故應寫作畫圖看。

自入春來往返嘉興湖州兩郡，凡六十餘日，穀雨後還家，花事盡矣。

累月扁舟碧水潯，歸來三徑已春深。樓頭一帶槎牙樹，多為黃鸝換綠陰。

題又微姪載花圖小影

落魄江湖不計年，風流別是一生緣。桃根桃葉無顏色，

迴避儂家載酒船。

再題種菜圖二首

還君一首遂初賦，和我三章學圃詩。彈鋏思魚原失策，封侯食肉更何時。

黃齏白蕪亦前因，腰腹如渠那稱貧。也與萬羊同一飽，算來原自可驕人。

題族孫恒弘看舞圖

可是相逢游冶場，由來壯士愛紅粧。試他舞袖長多少，虹暈輕巾是電光。

敬業堂詩集卷二十三

敬業堂詩集卷二十四

海寧查 慎行 悔餘

賓雲集 戊寅四月

春來既以近游名集是夏復偕竹垞先生作閩南之行淵明所謂饑來驅我也往反五閱月共得詩若干首唱酬者居其半釐為三集曰賓雲者紀遊武彛也曰炎天冰雪者取諸噉荔也而以垂橐終焉中間聯句數章竹垞已刻入曝書亭集茲不復刪義取各見存題目也

初發江干

江路羊腸迴江風羊角合 丘長春西遊記風初起如羊角者千百須臾合為一風可

證莊子羊角而上語漸近漁浦潭忽失六和塔

自漁浦挂席至富陽聯句

編郎唱櫓雨初消餘突起東風送客船百里晴山低似

屋竹一江新水健於潮舟人謂江暴漲時海潮不得上得携老伴無拘

束悔縱是貧游未寂寥况有月波春甕在竹隔船不乏

酒人招悔

又聯句一首

江山小船急浪衝竹疾若鷲鳥凌霜冬悔灣環忽轉赤

亭岸竹俄頃不見南高峯悔鱗魚出網白尾尾竹鳥相

夾路青茸茸悔井西道人畫不得竹暖翠浮嵐如此濃

悔

和竹垞雨泊桐廬限腹字

灘聲遠初喧山色晚逾綠官城上鐘濛濛雨中屋平

生湖海夢又近嚴陵宿濯足有烟波胡為加帝腹

和竹垞七里瀨限脚韵

老龍沒水風旋作合江亭西石勢惡兩蛇對走赴一壑

雲端百丈挽山腰井底孤蓬轉山脚

瀧中吟俗作龍亦作龍葉夢得避暑錄辨其謠云當作瀧閭江反今從之

瀧中亂峯高插天瀧中急水折復旋瀧中竹樹青如烟

白龍倒垂尾蜿蜒洩雲歎霧為飛泉晴光一綫忽射穿

雨點白晝打客船船行無風七十里一日看山柁樓底

有風七里無風七十里瀧中口號

晚次汝步乘月抵蘭谿城下  
飛盡漁灣白鷺鷥眾師逆浪上灘遲蘭溪城外數錢女  
月出未收青酒旗

雨發東峰亭

昨日不料風今朝不料雨生涯昧所向智不如商賈聊  
為山水遊旅興時一鼓東峰吾舊識嘉樹紛可數中流  
乍回頭悵若辭地主三衢渺何處去去信柔櫓自此西行余遊  
蹤向所未歷

水碓聯句四十韻

百灘趨漸江昏旦鳴不息竹大波恣奔放小波迴汨渚  
悔居人擅水利審曲引使直竹其長走蛟蛇其廣納溝

減悔渴防激之怒徑隘流轉亟竹夫豈水性然適來遭  
勢偪悔于焉扼其吭壘石添槩杙竹椽茅架小屋度地  
隨偃仄悔斲木為巨輪當衝立樞極竹旁安三十輻輻  
輻輳斤墨悔龜繇交兩兆驚甲支九肋竹括張等虞機  
璇運就圜則悔江心鏡欲躍海底月半蝕竹滅頂涸人  
騰升陟壯士踣悔尻高首或下後湧前忽匿竹團團牛  
旋磨匝匝鴉翻翼悔棗軸貫中央有如蒼在劫竹循環  
觸牙動揚者必先抑悔石臼質本頑甘為杵所賊竹昂  
然馬騰槽俛若鶴啄食悔砮砮應關楨次第符漏刻竹  
擣紙十萬牋取禾三百億悔穰穰除未盡藤竹需孔棘  
竹一為機事牽焉得休汝力悔先王昔制器取象配卦

德竹舟楫涉大川未耜徂畛域悔養生務佃漁分壤別

動植竹隣歌答春相作苦爰稼穡悔俾習四體勤群黎

無懈忒竹後世技巧繁滛竒難忖測悔桔槔輓轡作便

利成典式竹紛紛鑿渾沌一一騁胸臆悔能令蠢者靈

通者忽以塞竹即此水碓論用意略可識悔居然役造

化安坐無忤色竹乃知天生民若苗之有騰悔夜來山

雨驟趨漲漫澤國竹沙崩岸漂沈有械施不得悔物成

久則毀茲理復何惑竹逸豫安可貪民勞宜率職悔

和竹翁衢州城下作

開府專征地孤城盜賊邊身常當矢石險豈恃山川劉

渙何知反睢陽竟得全白頭遺老在對客話當年甲寅乙卯

之亂武定李文襄公鎮此浙東西數郡獲全

篁步去衢州二十里地產柑橘

百折金川水東流下石門碓床聲不斷炭塢氣長昏小

屋椽欄岸疎籬橘柚村荔支方入貢剩爾未移根

常山山行

常山小城如破驛細路多嵌彈丸石一乘竹轎役兩夫

雜遝前行隨估客憐渠雇直止百錢為我赤脚頰兩肩

我今亦復被物役何暇悲人還自憐

和竹垞沙谿舖

山田早插綠秧齊小犢新生未架犁閒背村童浮水去

牛欄只在岸東西

龔家渡夏文愍公墓道作

東市朝衣血西江野哭魂已無鄉社祭猶有墓門存亂  
水荒阡斷悲風宰木昏鈴山籍官後得謚即君恩

自焦石塘抵鉛山河口兩岸石山瘳劣上無寸  
土草木不生作詩嘲之並邀竹垞先生同賦以  
傳好事者

爾雅釋山名類族紛可數土山或戴石石山或戴土草  
木別有無無者名曰嵒挾筴事出游舊聞證新覩一山  
一巨石突兀向江澣若被烈火焚禿鬮了無取于獸燬  
其毛于鳥翦其羽于人為寡髮渾沌出太古無心腹臂  
膀無耳目肱股大疣齶盍懸醜疾遽篠俯陳根何處托

沈泉不得吐正坐山無情遂令旁少輔樵人弛負擔匠  
氏輟斤釜塊然天地間於世爾奚補

從河口陸行至鉛山縣三十里間山水清佳老  
樟古桂不記其數皆千年以外樹也所至輒流  
連其下自悔舟中誚頑石之作復賦此詩邀竹  
垞再和

溪迴峰巒竒雲日互虧蔽兩邊盡古木曲徑入蒼翠行  
人雜負戴偃憩隨所至如開步障陰下可萬間庇想當  
生材初造物本無意榮枯非分定蒙養在托地我昨嘲  
頑山無端坐好事目前不見睫幾欲一槩視向來身未  
經鹵莽悔輕議譬諸覘他邦不仁在高位輒云彼無人

賢者豈終棄作詩還自哂一解前言戲

鉛山城中有古樟三每歲四月白鷺來巢其間  
伏雛乃去亦一異也

恠底空城老樹梢鷺鷥引隊似蘆茭魚蝦飽噉無人問  
生子看看占鵲巢

和竹垞雨晴

入門兩脚垂出門雲氣遯皇天本無私邂逅適我願

紫溪道中二首

去城漸遠漸青葱畫裏谿橋曲折通無有一村無好樹  
歇涼人在小亭中

壘土層層勢就低石田如罽岸如梯清泉盡是秧針水

直到山根始作谿

度紫谿嶺

渡橋正亭午白日無匿景微茫紫翠間嶒嶸西南頂躋  
攀力已殫仰視猶半嶺迴風轉轆轤汲我出深井茅菴  
冠木末快若衣振領綠樹忽交陰蒼然失人影坐來殊  
氣候濁暑驚清冷匆匆行役心佳處惜俄頃

觀造竹紙聯句五十韻

信州入建州篁竹冗於篠竹居人取作紙用穉不用老

梅 遑恤簫笛材緣坡一例倒竹束縛沈清淵殺青特存

縞 五行遞相賊伐性力揉矯竹出諸鼎鑊中復受杵

白擣梅不辭身糜爛素質終自保竹汲井加汰淘盈箱

費旋攪悔層層細簾揭箔箔活火燻竹舍粗乃得精去

濕忽就燥悔擘來風舒舒暴以日杲杲竹箬籠走南北

適用各言好悔緬維邃古初書契始倉皞竹自從史記

煩方策布豐鎬悔中經祖龍燔孰敢撲原燎竹漆簡及

韋編殘灰跡同掃悔當時禍得脫賴爾生不早竹漢代

崇師儒家各一經抱悔截緝蒲柳姿刀削詎云巧竹如

何剗物智乃出寺人造悔麻頭魚網布棄物收豈少竹

後來逾爭奇新製越意表悔山苗割藤芟水滋采苔蔘

竹桑根斧以斯蠶繭機不絞悔澄心光緻緻鏡面波晶

晶竹研宜金粉膏繪作龍鸞爪悔桃花注輕紅松花染

深縹竹鴉青蜜香色一一隨浣澡悔十樣益部箋萬番

傳癖橐竹紛然輸館閣逝矣來海鳥悔要為日用需若

黍稷梁稻竹惜哉俗暴殄塗抹太草草悔俗詩鼃烟鳴

俗書蛇蚓繞竹俗學調必俳俗文說多勦悔流傳人有

集刷印方未了竹積穢堆土苴餘殃毒黎棗悔或汚蝸

角涎或供蠹魚飽竹或為肉馬踏或被饑鼠齧悔糊窓

信兒童覆甌付翁媪竹遭逢幸不幸所繫豈纖抄悔平

生嗜奇古卷帙事研討竹秘笈藉爾抄籟金匪吾寶悔

響榻湖籀斯斷碑拓洪趙竹提携白刺史著錄庶可考

悔由拳法失傳將樂槽苦小竹楚產肌理疎晉產膚澤

槁悔物情相倍蓰美惡心洞曉竹非無雲霞膩愛此霜

雪皎悔小疊熨帖平捆載赴達道竹預恐壓歸裝又滋



征權擾悔

烏石村

修竹連山萬萬栽，新新換葉碧如苔。特留老節非無用，

歲歲生孫作紙材。

村家造紙多，取新竹故云。

分水關

萬斛松風捲戍樓，泉源同在此山頭。忽教一塚巖墻劃，不許東西更合流。

崇安孔彛仲明府招飲縣齋池上分賦二首

南遊吾偶到北海，席頻虛未敢輕修刺。何當先下車客來，童掃徑衙罷吏抄書欲識閒官味。君看清獻渠

樹陰齋舫合荷氣，板橋灣水檻晴初倚溪門。夜不關座

中無俗客管內有名山，未到聞君說如遊九曲還。

彛仲于座

上極稱武，尺之勝。

和竹垞幔亭

幔設曾孫宴，歌傳鼓笛聲。神仙如可學，大抵屬多情。

冲祐宮

一溪隨擢轉，天半削兩峯。萬年宮在兩峯趾，古殿入門三五重。長廊白日氣幽邃，蔭以楓桂樟栴松。不知中有路，但見列岫四面排高墉。不知下有谿，但聞噌吰鞺鞳相應如鼓鐘。神仙高居道士俗，三月四月忙於農。苦言茶味薄，不足充上供。客來正炎熱，亟思澆此枯渴胸。頭網封裹度嶺去，上品一呷霑無從。明朝試扣白雲洞，洞

口老僧逢不逢

武尼茶出僧製者其價倍於道院

宿虞道士山房

晚涼新浴罷古觀有餘清一院松篁氣滿窓風雨聲擣  
壘因藥曰暖酒就茶鐺預飭齋廚飯山遊望曉晴

和竹垞仙蛻巖

生前不煉紫金丹身後何須白玉棺已向虛巖委枯骨  
癡兒尚掃漢家壇

虹橋板歌

板為崇安潘秀才在東所贈

潘生贈我虹橋板云此購得從仙山幔亭宴罷橋忽斷  
此木度在萬仞之孱顏蒼鷹健鶻對對巢不得但見成  
群接臂叫跳猿猴鬃黃冠白足力難致間出贖者相欺

謾有時晦冥晝風雨神物欲降天為慳前者偶經此巖  
下巖前白浪吞船豚忽驚片板半空落有若胎禽墮毳  
飛輕翹主人大咲童僕喜謂獲至寶非空還已令巧匠  
刻為佩何異袖鞭使物駮妖姦知君好奇特分贈徑尺  
未許酬千鍰我時聞斯語未敢相譏訕今晨入武尼好  
事搜險艱生為指其處乃在一曲二曲三曲灣初疑棧  
道上露出船尾彎復如鳥鼠穴竹箭亂插同榛菅神輸  
鬼運義奚取徑路斷絕誰躋攀忽憶少年日南走五溪  
窮百蠻蠻人寄命巖洞裏多構柴棚臨崢嶸今之所見  
正此類亦如秦客避亂來其間不然飈輪雲馭本飛渡  
豈有剗木留塵寰摩挲重是千歲物肌理駁蝕生香斑

敬業堂詩集卷之四  
九  
携歸壓書儘有用何必新奇瓌詭驚愚頑

和竹垞小九曲石壁是唐許碣題詩處故名題

詩巖

附錄借詩閣苑花前是醉鄉召翻王母紫霞觴群仙拍手嫌輕薄謫向人間作酒狂

石上三生事渺茫題詩重過苾芻房此中大好安茶竈  
何苦人間作酒狂

和竹垞御茶園歌

宋茶貴建產上者北苑次壑源研膏京挺

南唐貢茶名製一

變爭新鬪異凡幾番白龍之團青鳳髓輦載入洛重馬  
奔武巨粟粒芽其初植未繁何人著錄始經進前有丁  
謂後能蕃君謨士人亦為此餘子碌碌安足論宣和以  
來雖遞驛場未官設民不煩元人專利及瑣細高興父

子希寵恩大德三年歲己亥突於此地開茶園中連房  
廊三十舍繚垣南北拓兩門先春次春徧采摘一火二  
火長溫磨緘題歲額五千餅雞狗竄盡山邊村携來詐  
馬筵和入潼酪供鯨吞豈知靈苗有真味石銚合煮青  
松根爾來歷年已四百御園久廢名猶存筠籃四月走  
商販茶戶幾姓傳兒孫我思鱗魚橘柚任土貢微物亦  
可充天闈朝廷玉食自不乏何用置局灾黎元追思興  
也實禍首幸保要領歸九原山靈曷不請於帝按女青  
律答其魂傳語後來者毋以口腹媚至尊

仙掌峰瀑布

接筓仙掌峰入望初聯綿兩崖訝然豁一瀑垂蜿蜒不

從仙翁指間出却穿左脅下赴六曲為奔川行人衣沾  
芒屨滑拄杖直上孤雲巔崎嶇丘前石徑轉胡麻小澗  
當橋邊尋源初自稻田發三里五里斷復連淺處生菖  
蒲深處得種菱與蓮千年老蟾蜍爬沙亦頑仙仰天喻  
其舌噴水一竅清而圓始知山前雷轟礮激千丈瀑布  
水即是山背涓涓泉匏樽便向道人借我懶欲住清涼  
天

天遊觀萬峯亭

占地既已高尤難在扼要前臨殊陡絕旁睨轉孤峭群  
雄奉一尊奔赴不待召來時記目擊歷歷本形肖羊群  
呼可起仙羊馬首回若掉馬頭象鼻垂彎環象鼻獅頭

仰軒越獅子鼓鐘應考戛鼓子龍虎答吟嘯臥龍潭

兜鍪勇士冠兜鍪粧鏡神女照粧鏡臺石笋瘦而長接

峰蓮花娟且妙蓮花到亭悉殊狀變幻非意料初高後

反匿曩隱今忽跳投空翻白鴉削背掠蒼鷄烟生松外  
村竹亞崦中廟清溪截羅帶已斷復縈繞澄泓鷗鷺池  
中有一翁釣流觀飽創獲俯仰恣吟剽翻嗟神靈區僻  
左落遠徼竒峰三十六名可配嵩少奈何杜韓輩足未  
涉閩嶠山靈秘莫宣自古閉窻突我來及新晴朗日相  
照耀終疑雲霧窟滃渤尚埋竅幸賴此孤亭于焉踞翫  
戲重遊果何時臨去屢回眺

坐竹簞入九曲聯句

連峰六六收蒼霾悔 雨餘滑澆碎石街竹 挈我栗杖樓

毛鞵悔 蘭湯渡口上竹簿竹 篙工初指一曲涯悔 姓名

幾輩爭磨崖竹 娉婷玉女峰最佳悔 野花簇髻松搖釵

竹 當年武尺集神媧悔 歌絃鼓板金管齧竹 高張雅奏

無淫哇悔 子禽小蛾定爾儕竹 群仙一散後會垂悔 黃

心老木委蛻蘊竹 爾獨對鏡留形骸悔 千尋鐵障鎔頑

錯竹 大藏小藏肩背揆悔 山魃獨脚帝所差竹 洞門石

扇呀然闖悔 壑舟力負何劬勅竹 其中瑰木類積穢悔

又類羽鏃抽鞞鞞竹 水光泱泱聲潏潏悔 冥冥微徑不

可階竹 欲往金井迷鬼艾悔 深潭龍臥波滾滾竹 誰歟

釣者貪鮪鮭悔 茶園新芽出舊荻竹 僧籃道笈采摘皆

悔 可惜不逢紅粉娃竹 題詩古巖平不欬悔 精廬小於

負殼蝸悔 豈若大隱屏之厓竹 祠宇百世人模楷竹 大

書照耀銀泥牌悔 學達性天 聖德諧竹 屹然天柱高

歲裏悔 勢如拱揖趨庭堦竹 須臾路迴仙掌排悔 神臯

下上車輶輦竹 竹窠桃澗雜樹槐悔 龜浮獺控形膠睞

竹 白雲莽前雙眼揩悔 俯視九曲滌青縞竹 新村村落

尤可懷悔 新苗活水通荆柴竹 穀犬跳聒雞膠喙悔 况

無蛇虎狼獠豺竹 何時買地營茅齋悔 畊糞漁弋與子

借竹

和竹垞建陽

考亭本是黃家墓侍御橋邊宅久空陳跡已消名姓外

好詩猶展畫圖中後來結構原因此佳處溪山遂屬公  
 欲買麻沙村畔屋餘年拚作蠹書蟲唐末侍御史黃子稜自洛陽寓居建陽東觀山築亭以望其父之墓曰望考亭因以名里朱文公之父韋齋先生愛建陽山水未及卜居公築考亭以承先志正取黃侍御之意後人專以考亭屬文公侍御之名湮矣人過小橋頻指點全家都在畫圖間侍御詩中句

樟灘

小縣晨發船建溪展平綠前行三四里跳沫粗如鵠厥  
 名曰樟灘畜害自古酷假令勢下趨直瀉無迴躅石梁  
 伏水底未免防坎毒奈何三折形故作巴字曲湍奔方  
 有激石起陡被束一芥一針投中間不容粟兩旁劇刀  
 劍悍惡伺失足篙工善駕馭肯與怒機觸馴彼積豕牙

服我童牛牯終焉脫於險初若順所欲方悟不擾心可  
 以遠蹶促側聞前灘多恠石難悉錄吾生不有命恐懼  
 隨羸僕

雨中下黯淡灘

未到先愁出險難忽驚片葉落奔湍星流電轉目未瞬  
 一道白光飛過灘

延平晚泊

小雨冥濛劔浦西浮槎壓水女垣低人家多傍翠巖住  
 榕葉滿城山鷓啼

水口

雨餘忽飄雨數點山外更添山幾層六百里灘多過盡

也如出峽到夸陵

小箬驛榕樹

古驛千年樹蟠根積水涯細筋堅作骨新葉嫩如花綠  
處陰三畝枯邊畫一椹散材真自幸剪伐幾曾加

竹崎關

佛桑花根犬吠龍眼枝頭鳥鳴漸覺山平水遠郵籤報  
近榕城

贈汪悔齋方伯

國家有異數畸人出當之巍巍宏博科鶴鳳集一池公  
來承主眷初亦由文詞繼乃悉公才拔萃超常資我  
朝拓遐陬南不盡島夷勿輕發介使大體存羈縻曠典

偶一修擇賢誠足毗公時膺特簡啣命東南馳粘天

駕波濤帖首馴蛟螭平生抱忠信涉足無嶮巖肅將明

明威慎重瞻丰儀必若誕文教要令崇先師鰲背屹宮

墻作記刊諸碑餘事當潤色問俗陳風詩手持王會圖

歸獻白玉墀至尊動顏色前席為頻移迄今奉使錄

燦若星日垂自茲益嚮用歷試無不宜試公以吏治出

領嵩洛伊政成多異蹟獨創非前規試公以擊斷明決

仁且慈八閩百萬戶立起殘瘡痍試公以大藩旬宣來

保釐民勞既已墜國計終無虧凡此十年中官塗自透

迤旁無汲引力皆受特達知煌煌名書屏屢被褒美

辭行省尚見屈看人換旌麾賤子田間來於公少恩私

側聞道路口籍籍皆如斯當今梁棟材大器非公誰公  
昔守洛陽舍弟久追隨猥蒙齒頰及佳句時或披堦前  
尺寸地投謁獨恠遲男兒屬有願會合寧無期携我作  
遠遊竹垞真好竒武廾昔未到昨始慰所思此來復識  
公又得啖荔支何期寂寞遊三樂併一時篇終述已意  
公幸勿見嗤

敬業堂詩集卷二十四

敬業堂詩集卷二十五

海寧 查慎行 悔餘

炎天冰雪集

起戊寅五月盡六月

端陽前二日初食荔支戲寄德尹時弟在蘭州

二首

荔子初紅到福州絳囊欲擘已涎流阿頻來往如相避

咲擲閩南一度遊

弟於甲戌二月遊此四月還家未嘗敢荔也阿頻弟小名

方紅陳紫價爭高次第行將飫老饕直作衝炎吾得計

西遊終不羨蒲桃

魏文帝以蒲桃比荔支世訊其繆

西施舌

一名沙蛤

尤物佳名托依然住水鄉死難逃越網生只戀吳航

沙蛤



產吳航  
者佳

### 香螺

螺女江邊產形麗味特奇客廚貪一飽空殼付僧吹

梅聖

俞詩佛寺吹  
螺空唱嚶

蝓閩大記一  
名蝓蚌

味美尤在螯一枚十錢買自從擘蝓蚌不憶分湖鱗

鱮魚腹下有十二足雌雄  
常相負取之輒作雙

介屬魚其名雌雄同一束爬沙苦無力安用十二足

### 花蛤

入水化幾時登盤復充膾剗腸誰見憐文采却在外

### 黃螺

藏尾露兩角肉黃漫多腥時於蝸殼中自負楞然形

### 珠蚶

珠蚶細已甚魚鱗鵝眼許海錯幸自多烹鮮乃及汝

### 食江瑶柱

河豚豈不佳中毒時有之須臾聊為性命忍當筵輟箸  
甘被旁人嗤半生夢想江瑶柱客或誇示長朶頤南遊  
無一事直為口腹寧非癡土人向我言惜來非其時客  
欲嘗此味請以冬為期清晨無端食指動腥風恠雨入  
座紛離披天教尤物落吾手海市忽逐神鞭移常鱗凡  
介盡辟易獨許上品當釜錡其形初如羊角合倏若蝙蝠  
兩翅張襪襪格高味厚少為貴中間甲柱孤撐搯滄

以百沸湯逡巡發華滋鮮於金盤露潔比白玉脂食經  
百六十五卷鳴薑點醬無不宜良庖俗庖兩兩割烹好  
方法不用傳嚴龜隋大業中刻淮南王食經一百六十五卷唐人嚴龜有食法十卷退  
之引類及章舉坡老比儼到荔支二公評隲竟誰是吾  
方飽噉不暇措一辭

林草臣攜酒見過

草堂無定所亂後屬他人愛客老尤篤論交晚自親割  
鮮兼眾味載酒過比隣一醉叨深眷翻憐地主貧

養蜂歌

逆旅主人貪養蜂木櫃中結房千重別開孔竅聽出入  
高置簷宇虞奔衝頗同君臣儼有禮稍別種族如知宗

兩衙薨薨勤鼓翅四序擾擾無停蹤婦姑勃蹊或同室  
子弟盛壯旋分封秦宮每向花底活韓憑大抵枝頭逢  
苦兼黃連充藥使甘比稼穡成花農乾坤大哉類斯聚  
形體眇爾性則兇天生是物本巖谷於世無競宜相容  
自求辛螫誰作備乃至役物為人傭僦居一椽在隘巷  
偏側欲避愁無從明知倉卒非大害未免有意防針鋒  
吾將縱女任所適解衣盤礴便踈慵主人一咲不見許  
留待割蜜當嚴冬

汪學使棗園寄餉興化荔支

南越百株移遠植西川一騎走炎埃如何兩日楓亭路  
也為先生置驛來

林竹筠封翁招飲榕菴

山根沮洳濕蒼苔別業重新鑿石開但使周遭留竹樹

不妨次第補亭臺五經又課諸孫讀次公碧山以五一經擢第故云

榼頻携遠客來拍點舊時門逕改雙榕前歲拔風雷門

榕樹二株丙子七月為大風所拔

汪悔齋方伯署庭有荔支小暑後摘以見餉率

成十六韻

陰合重樓外枝垂曲檻東珊瑚推舊譜玳瑁占新叢畫

省初凝露薇垣迥得風繁星紛乍摘白雪沃俱融步障

絲褰紫宮衣袖卷紅品方瑤柱美東坡梅溪以江肌愛

玉環豐只許輝銀印白樂天寄楊使君荔支詩對君銀印色相鮮何期餉竹

籠從來臭味合大抵餽貽通不是分甘好將母嚼蠟同

炎官方赫赫熱屬又蟲蟲解駁涼無汗醫蠲渴有功稍

宜親夏輦惟欠剝春葱長樂全勝畫郵亭尚憶楓長樂

名勝畫者可與興化之楓亭相匹皆名種晚熟者近應來郡縣遠不比瀘戎少

詩憶過瀘戎摘荔支旅橐終難致頃筐倘更蒙此遊專為口貪得

咲何窮

甘泉漢瓦歌為候官林同人賦

林生老立專門學金石遺文卷盈握曾經從宦走長安

斷碣殘碑薛親剝昭陵蹟廢補亡闕磨石山高穿硤确

冰霜裂面虎豹嗥沙礫堆中拾完璞摩挲銅狄自何年

萬棟灰飛片瓦全為按黃圖考宮殿始知地是漢甘泉

底平面正規而圈肖形似鏡還如錢其高半寸徑三寸  
 旁具輪郭中不穿土花蝕後文留識音志上有長生未央  
 字龍拏鳳攫結撰奇肉厚肌疎形體異與人作硯不中  
 用抱質如初無變置吁嗟乎楊南劉不作識者希時  
 俗誰能辨真偽巧多滋偽樸者真此瓦人間蓋無二豈  
 同冰井香姜閣堦堦紛紛托疑似勸生勿更加礪磨本  
 色須教存古意生領此語索我詩我詩質直無姱辭請  
 煩拓致數十本徧乞羊何共和之或恐流傳落人口陶  
 甄又復成今手

張民瞻舍人趙二今孝廉同日餉荔支

側生倒挂頰虬珠後先磊落致座隅空齋長夏失炎熱

中有仙姝冰雪膚太真飛燕兩媚嫵那辨徐家蔡家譜

新譜蔡君謨著甫田譜徐師閔著野人揣分已不廉一飽今朝煩二主

此生大嚼知幾回一日可少二百枚從茲便結荔支社

用東坡嶺南事日日西禪寺裏來

六月初六日同竹垞青壇過長慶寺噉荔支二

首

碧蘚埋唐碣紅雲擁寺門客嘗初揀樹僧引為開園甘

露充香飯清泉注瓦盆分沾徧僮僕猶自壓枝繁

蚶殼稍稍重星球箇箇圓生偏當遠嶠吾及遇豐年寺僧

云今年荔子最熟似為遠客設供邂逅三人話衰遲一飽緣勿嫌來較

晚禽鳥讓爭先

與陳漳浦莘學話舊

誰憐香案吏遠謫到天南索米洵非易折腰良不甘山  
租輸海貝市舶賤迦楠喜拜貧官惠輕風白葛含詩以廣葛

贈見

數日前作詩報悔齋方伯末有無厭之請蓋在

楓亭荔支也朝來果蒙分餉再成一律

四樹楓亭種曾經入貢餘人間應漸少名下果無虛絕

品慚供客兼程苦累渠色香全未減地主誼何如驛庭只四

樹樹老半枯枝閩人宋比玉荔支詩也

龔運使榕溪招飲園亭

擲印歸家鬢未蒼手栽梧竹闢池塘到來但覺綠陰好

坐久始知清晝長客子解衣思避暑主人投轄怕逃觴  
不辭戶小拚沈醉三伏世間無此涼

飲陳集斯烏石山莊

炎天塵滿街襪襪何太苦野人寡酬酢一飯必擇主陳  
生靜者流邀我遊椒塢小樓城北面豁達寄簷宇漸入  
轉幽深忽高迷步武清泉閱巖竇涓滴時復吐碧眼貯  
渟泓瀉為荷芰渚隔籬微辨徑疊石不帶土瘦竹走長  
鞭淡花垂細乳木桃正垂實木桃似木瓜而有紋上結一臍如小桃錯落

指可數中無一蟬嘶上有獨鶴舞孤亭出林表七塔皆  
下俯客來導攀躋赤日方卓午清涼徹山骨快若新過  
雨善病君得閒息交吾獨取何當把鑿柄共治黃精圃

六月十四夜喜雨

撲扇蚊蠅苦不支，乍涼聊與睡相宜。  
一窓歸夢芭蕉雨，六月驚心蟋蟀詩。  
遠客交遊長寂寞，殊方節物極參差。  
明朝紅屐城西路，已是潮田穫稻時。

題讓竹亭修禊圖卷

何必山陰亦有亭，一時盛事又丹青。  
舊因洗竹開三徑，新為栽花讓半庭。  
詩好儘容僧入社，客來總與鶴忘形。  
年年上巳風光在，長指天南聚酒星。

送龔仲圭歸合肥

嗟余生苦晚前輩，目未識側聞長老言。  
蘊穉推厚德，煌煌端毅公。  
古道手扶植，南宮昔校士。  
良窳就陶埴，至性

實憐才，搜羅如不克，謂宜餘澤在。  
十世報猶食，公子負英才。  
承家奉軌則，干人非本意。  
負米貧自力，堂有白髮親。  
傷哉彼屺陟，通門謁開府。  
願望良易塞，舊時桃李花。  
當路化荆棘，交幾厄陳蔡。  
歸及課畊織，不污棗囊金。  
正復壯行色，螺江水新漲。  
帆影輕比翼，一事足誇人。  
來從荔支國。

薩天錫詩紅塵香煖荔支國

仙遊茅筆歌

群上海上來，絡繹趨九仙。  
僊翁此山住，示夢於幾先。  
九仙祠祈夢最靈  
山中老樵枕石眠，斧柯斷爛不記年。  
夢中髣髴遇神授，筆花晝吐黃茅天。  
覺來信手縛不律，巧被筆工偷妙術。  
遂令九仙祠下三脊茅，用與雞毛鼠須匹。  
中書

免冠頭不禿管蒯居然效微質幸渠一束價未高殿頭  
簪珥非汝曹若教朱墨官盡取便恐仙山成不毛君不  
見連山伐竹兔拔毫鐵梳膠綴何其勞穢史自執奸吏  
搯直與此輩供錐刀老夫抄書拍生繭怕搦人間管城  
管塗鴉結蚓隨爾為不要殘年護吾短

壽山石歌

周禮重璽節後來印章母乃同自從秦人刻玉稱國寶  
此外雜用金銀銅鑄成往往上戴紐負鼎作力碑跌雄  
橐駝羔鹿虎豹龍細者龜兔巨者貌與熊肖形寓像隨  
所好繆篆法與蟲魚通漢時斗檢封下沿唐宋仍相蒙  
神龍貞觀宣和中六印旁及金章宗當時御府收藏及

書畫首尾鈐識丹砂紅民間私記不知幾千萬楊克一

古印王厚之有復齋印譜姜夔有集古印譜趙子昂有集古誰能窮車

磔瑪瑙犀角及象齒苟適於用俱牢籠後來摹刻忽以

石其法創自王山農元末諸暨人王冕自稱煮石山農始用花乳石刻私印自元

歷明三百載巧匠到處搜碯墜吾鄉青田舊坑凍價重

蒼璧兼黃琮福州壽山晚始著強藩力取如輸攻初聞

城北門日役萬指簪千工掘田田盡廢壽山石產田中者最佳鑿

山山為空崑岡火連三月烽玉石俱碎汗其宮况加官

長日檢括土產率以包苴充今之存者大洞蓋已少大洞

所產亞於田石別穿巖穴開笑容今所用者皆出芙蓉出巖居人業此成石

戶斑白老叟携兒童采來製紐尚倣古一一彫琢加磨

龍我聞金石古稱壽茲山取義奚所從如何出寶還自  
賊地脈將斷天無功山靈有知便合變頑礦庶與鴻蒙  
混沌相始終

以蜜漬生荔支戲成一律

蠟黃封帶上方奩

未入蜜時先融蠟封帶

兩月南中已屬厭筐篚

人情憐白曬瓶罌方法愛紅鹽

白曬紅鹽俱見君謨荔譜離枝便減

三分色入蜜懸知一味甜珍重老翁親手摘歸教兒女  
得分沾

飲張氏瞻齋

出墻藤蔓走龍蛇指點相過路不賒却喜隣居連北巷  
每拈書籍問東家

寓舍去張最近頻得借書故云

涼生翠蓋亭邊雨風

落紅薇屋角花借取深杯還接燭不愁官鼓夜催搗

是夕

微雨竹垞先歸余及龔容溪兩人復留縱飲

高斯億為余畫竹以詩報之

畫竹原從草書出眼中孰是張芝筆高生善書久絕倫  
餘技兼為竹寫真自言亦用狂草法頗覺遊戲能通神  
無諸城中少修竹客舍連旬苦炎毒賴君妙手補化工  
為我一揮終十幅幅終擲筆風雨來野人疎爽心顏開  
須臾雨止墨光濕潤入紙背生蒼苔老龍蛻骨瘦嵒強  
翠鳳掉尾紛毳毼雄氣大腕力壯盡掃篠蕩皆凡材  
忽然幻作鐵鈎鎖

江南李主作竹自根及梢極小者一鈎勒成謂之鐵鈎鎖自云惟柳公

權有此筆法

世有誠懸應識我渭川千畝胸鬱蟠放縱精微



無不可文湖州派繼者難後來獨推王孟端人間多畫  
風中柳東坡題文與可墨竹詩那珍重蕭郎十五竿斯  
墨竹甚自秘重故  
用蕭悅事為比

福州太守毀淫祠歌

愚眊致貧益有術祈福淫祠亦其一八閩風俗尤信巫  
社鼠城狐就私暱巫言今年神降殃癘疫將作勢莫當  
家家殺牛磔羊豕舉國奔走如風狂迎神送神解神怒  
會掠金錢十萬戶旗旄夾道鹵簿馳官長行來不避路  
忽聞下令燔妖廬居民聚族初睚眦青天白日鬼恠遁  
向來祇奉寧非愚嗟嗟千年陋習牢相紐劈正須煩巨  
靈手江南狄公永州柳此事今亡古亦偶獨不見福州

遲太守

題悔齋方伯小照二首

鯨呿鰲擲氣何如目送雲濤蕩碧虛記得大羅天上事  
澥山難著白尚書

獨立蒼茫又一奇長松恠石兩叅差披圖聊識高人意  
未是科頭曳屐時

楊浴菴餞別於謀野莊

黃門門下無多士楊為先黃門伯三十年來盡罷官白  
首荷君存古道清樽留我話更闌科名得路人餘幾子  
弟能文事最難別後倘逢潮信便好從魚素報平安

垂橐集起戊寅七月  
盡十二月

舟發螺江林草臣張民瞻追送於洪山橋

小雨作秋涼扁舟客將返殷勤良友意送我不辭遠洪塘十五里短亭復長亭可憐橋下水臨別難為聽來時梅子黃去時龍眼熟新歡旋已散後會恐未卜勿謂嶺海遙合并諒有由所嗟迫衰賤去住兩白頭

朝發竹崎順風晚抵水口驛

荔海南來得飽餐此遊那更咲無端歸帆偶得東風便

明日方知上水難自此以上皆險灘矣涼月一梳微帶暈暗潮三尺忽平灘炎方未必無清景貪向船頭坐夜闌

初上灘

建溪之惡惡無比狠石高低勢隨水竹篙如鐵船似紙

曲折蜂窠犬牙裏南浦迢迢六百里大灘小灘從此始黃河亦可濫觴耳不到水窮行不止

逆水逆風歌戲呈竹垞

逆水曠強弩逆風簸蠻旗澁灘怪石張頤頤使我有筴不敢拽有篙不能施但見北來船乘流挂席東南馳我欲問天天不可問丈夫處世各有利鈍塞者自塞通自通造化小兒遊戲中解后兩相值我適遭其窮却咲竹垞老與我同舟還遇風乃以我故兼累翁翁今涉世頗知退坐狎雷霆如一噫我拍手翁和歌人生大都逆境多順流豈遂無風波

七月十五夜泊埂程

一村樹合煙初暝四面山高月未升隔岸聞鐘知有寺  
滿川風浪放河燈

折紙灘

去尤溪縣二十里

可憐尤溪灘險於太行山羊腸九折有路猶可攀折紙  
一折乃在疾雷掣電中央間高下既懸絕東西故彎環  
上灘不易下更艱有生寄命脆如此揺手休輕過折紙

箭孔灘

銅牙發利矢未足喻其急小舟欲穿針孔入石梯倒行  
三十級強弓寸寸彎不得羿殼不中嗟何及束手號天  
天雨泣

茶陽灘

舟人口號云大水大湘小水茶陽謂水落時茶陽最險也

大水大湘小水茶陽亘川塞路如牛如羊叱之不動迺  
是石波臣橫路千步岡當時大禹疏鑿不到此漸長牙  
角勢莫當棄置九州外放流比投荒如今郡縣關海外  
尚於中道梗咽為民殃何人為剷除毋令與水爭強梁  
石言吾何辜水性本易怒請君看取淮揚交正坐中流  
無砥柱

盆灘

灘險寓盆名波瀾頗不小寄語踏浪兒如何狎池沼

雨後過南鵝口

暴漲添三丈朝來冒雨涯山深惟古戍岸轉忽人家苦  
竹秋來筍紅薑雨後牙似聞靈鵲語報我過南鵝

朝來聞鵲

聲延平以  
南所無也

建寧遇德州田子益以蜜漬荔支分餉

兩月三山客歸裝但荔支製來經我手開處朶君頤野  
饋憐同好人情感過時平生甘苦分一味不曾私

飲甌寧陳明府陞來縣齋

京國三年別溪山半日留眼中逢地主意外繫歸舟對  
酒寬相憶當歌感昔遊應憐舊同學臨老獨漂流

萬石灘

俗名阿彌陀佛灘  
中流有三石幢

物各以類從號石數有萬波流石自止於義特取良憶  
昨經茲灘嶄巖爭自獻今看三石柱尋丈纔露寸一條  
換骨龍掉尾秋更健逡巡溯流上淹滯得无悶揚帆過

須臾正賴長女吳舟人歸佛力剪紙酬夙愿老夫亦欣  
然滿酌不待勸

大小米灘

掀波成山石作底風平石出波瀾瀾秋天一碧雨新洗  
大灘小灘如撒米

牛頭牛尾灘

牛頭彎稜稜牛尾直挺挺牛腰沒水五里長牛角雙雙  
亞桅頂我聞灑瀨如馬戒舟杭爾牛曷不服爾箱又聞  
刻石作犀鎮水怪爾牛胡敢恣為害夜從甯戚飯朝就  
巢父飲或簑或笠或詛寢客過灘頭亦安枕

重過雙溪口懷武夸舊遊二首

雲封霧冒失烟鬟縱棹曾從九曲還自覺秋來遊興嬾  
竟貪歸路不登山

颺飄笙鶴萬峰頭只許南來一度游不分此生難再到  
蓬萊風近且迴舟

迴龍渡

已窮三日程未盡西甌境晚煙投古渡歷歷見人影此  
際仙霞關東走括蒼嶺中間小聚落百舍同一井結屋  
深箐中開田萬松頂年豐米價賤市散村聲靜野戍依  
其旁孤燈光耿耿雖無荷戈役尚有擊檣警殘月猶未  
生寥寥秋夜永勞生竟何事俯仰媿清景

龍牙灘

垂龍竊天符吸霧南入海無端蛻鱗甲隨地幾千載帝  
將馴擾之不忍甚厥罪已令化為石本性終未改欲遣  
水逆流障川作峩嵒河神勿聽命蓄怒更百倍森然磨  
其牙昂首若有待舟行一不戒適掬魚鱉饅幸以險著  
名設防亦每每篙師出全力遇此愈精采滅頂世豈無  
母貽過時悔

蓮花灘

潭潭積水中沈石知多少偶然一呈露妍醜難自保茲  
灘乃以蓮花稱秀出溪面開層層惜哉非所據徒取見  
者憎不見關中岳蓮撐兩峰江上九子名芙蓉千年老  
鶴巢雲松仙居縹緲築臺殿復有詩老來扶筇爾今胡

為不自拔縱使媚好誰為容漁翁溪女詎知賞惟見蚌  
沫相噉喙石兮如有知得地未必非遭逢

鼠灘

五行紀異古垂戒銜尾渡江占鼠恠從來一穴可沈舟  
為禍於人豈在大張湯雖酷未盡除我今方嫌漢網疎  
致令此輩繁有徒詭托黠狀生江湖安得秦時鞭石法  
駢使浮沈逐鵝鴨太倉溷廁從渠偷切莫飲水污清流  
同學王令詒於庚午冬過嶺有南浦見寄絕句  
今日至浦城追憶前詩和此遙答時令詒宰黔  
之銅仁

平生怕讀江淹賦南浦今來別恨同此地故人曾憶我

一官今落瘴烟中

綠波亭

愛山愛水成吾癖一咲艱辛亦飽經虎舌龍牙初脫險

二灘名

又題詩上綠波亭

行經夢筆山下

詞賦成名只等閒寸心得失略相關詩人老去防才盡  
不敢輕嘲夢筆山

發浦城晚宿漁梁嶺下

城北城南叫鷓鴣似言前路極崎嶇回思習坎真輕命  
頓覺升高是坦途戍壘防秋仍鼓角人家經亂久榛蕪  
殘燈影裏蕭蕭夕萬疊荒山客夢孤

梨嶺廟前古松為火所焚作歌弔之

吾聞梨嶺廟前老松樹舊與嶺勢爭岌嵒此廟有興廢  
此松閱世不知凡幾朝亦不知其高幾萬丈直從山根  
拔起上蔽山之椒今來何闐寥竿籟不復聞簫韶可憐  
去年秋已作霹靂焦雷公斬斷青虬腰白鶴飛去誰能  
招豈無榭榭與竹柏坐覺滿山氣象入望成蕭條獨留  
古根深澗底神呵鬼護如靈苗茯苓歲久化琥珀居人  
德薄何敢以倖邀翻思十年前東南寇盜蜂擁潮山童  
石赭供爨樵汝於此時幸得脫賊兵不斫乃被野火燒  
天既賦良材使得干雲霄胡為灰劫隨僧寮長成艱難  
摧拉易自古在昔非今朝嗚呼自古在昔非今朝

度仙霞關題天雨菴壁

虎嘯猿啼萬壑哀北風吹雨過山來人從井底盤旋上

嶺下有龍井

天向關門豁達開地險昔曾資劇賊時平誰敢

說雄才一茶好領閒僧意知是芒屨到幾回

峽口

初入衢州界

矮屋荒村岸浮橋亂水灣船初通峽口路已入鄉關紅  
斂初沈日青餘未了山沙田秋熟早牛更比人閒

雨中過江郎街二首

奇峰登五老秀嶺度雙姑昨度大小楊姑嶺好咲三郎石朝來

却避吾

雨滴松杉徑煙迷穉耜鄉秋山行處好何必識江郎

曉晴發清湖鎮舟中望江郎山

碓牀石瀨響泠泠愛入歸人舊耳聽  
岸草綠痕移蟋蟀水花紅影帶蜻蜓  
樵爭曉市秋初霽風轉荒灣擢一停  
雲霧不遮南望眼三峰回首偪天青

雲尖渡即日

水鳥插頭眠近船忽群去只有一條谿  
前飛落何處

兩夜宿王子穎龍游學署

先生六十鬢將華老去方憐始願奢  
百里好山長繞郭一官閒地便移家  
空堂對酒涼生幔細雨移燈夜落花  
分爾歸裝無俗物芙蓉巖石竹窠茶

巖陵二絕句

巢由等是未稱臣自占箕山潁水濱  
誰遣州名屬流寓却疑此地竟無人

信公門下實多才柴市餘生大可哀  
不是英雄誰有泪更無一個哭西臺

夜發富陽曉至泥汙避潮小泊

浦口沙積岸潭頭雨壞橋客程兼昨夜  
鄉夢破今朝小堰孤舟渡荒山八月樵  
風波歸更怕不賦廣陵潮

吼山

天開地坼石崢嶸一棹穿雲入舊城  
喚起清風答長嘯滿山松栢盡雷鳴

偶遊蘭亭



黃茅十里騎驢路中有南朝內史祠墨本尚傳修稷帖  
紅墻新護御書碑浮橋過雨衝泥渡曲水平階疊石  
為一咲山陰付陳迹人間何事不兒嬉

語溪舟中與竹垞別

一條柳標一扁舟每過佳山約少留榕葉蕉陰消客夏  
芡盤菱角到家秋粗償行脚平生債不爽歸期汗漫游  
我有新詩同七發起翁微病待翁酬

時竹翁方抱病

閩中垂橐而歸家人適告米盡口占二律

烏有歸來問子虛鄉園米價近何如雞爭野老場邊粟  
鼠嚙先生案上書閱世始憐貧是病占年空說衆維魚  
荔枝飽噉吾知分此福從來有折除

半生顏狀忝風塵檢點身謀悔亦頻辟穀有方宜拔宅  
毀車無用是勞薪篋空咲貯加餐字吾老羞為乞米人  
賓客不來僮僕散免教鵝雁惱比隣

昌黎詩隔墻極鵝雁

戊寅除夕

手中著擲流光過

東坡詩流年已似手中著余今年四十九矣

老境猶彎寸

寸弓鄉曲無醫憐病婦米鹽何物累衰翁一家懸磬豐  
年後萬事挑燈此夕中那不癡騃逐兒女試看禿髮已  
還童

荷葉堂言集卷三十五

七

